

四庫全書

集部

欽定四庫全書

集部

御定全唐詩錄卷

七十一

詳校官左中允_臣瑋五珠

主事銜_臣徐以坤覆勘

總校官原任中允_臣王燕緒

校對官編修_臣沈清藻

謄錄監生_臣陳秉寧

欽定四庫全書

御定全唐詩錄卷七十

張祜

祜字承吉清河人初以宮詞得名五言詩善題目
佳境言不可刊置他處長慶中令狐楚表薦之不
報辟諸侯府多不合自劾去嘗客淮南杜牧深重
之愛丹陽曲阿地築室卜隱性嗜水石悉力致之
不畜田產為身後計

雲溪友議云祜初與徐凝同赴白居易杭州求解
白試之以凝居首而次祜祜不服自述佳句及觀
獵宮詞二首白云君獵詩欲以較王右丞乎宮詞
四句中皆數對何足奇因太息歸自此罷舉又云
祜長慶中深為令狐楚所知楚鎮天平自草薦表
令以詩三百篇隨狀表進祜至京屬元稹在內庭
上問之稹曰祜雕蟲小技壯夫不為或獎激之恐
變陛下風教上領之於是失意東歸有孟浩然身

更不疑之句又云杜牧嘗論元白詩體外雜因茲
有恨守秋浦與祐為詩酒交以白有非祐之論頗
不平之有詩云誰人得似張公子一首詩輕萬戶
侯又云如何故國三千里虛唱歌詞滿六宮欲異
於元白以曲成祐焉

祐今多誤作祐祐有子望虔為冬瓜堰官祐自謔
冬瓜合出瓠子事見太平廣記此名祐之証

古體詩

西江行

日下西塞山南來洞庭客晴空一鳥渡萬里秋江碧惆
悵異鄉人無言空脉脉

送蜀客

楚客去岷江西南指天末平生不達意萬里船一發行
行三峽夜十二峯頂月哀猿別曾林忽忽聲斷咽嘉陵
水初漲巖嶺耗積雪不妨高唐雲却藉宋玉說我眉遠
凝黛脚底谷洞穴錦城晝氤氲錦水春活活成都滯遊

地酒客須醉殺莫戀卓家壚相如已屑屑

車遥遥

東方曨曨車軋軋地色不分新去轍閨門半掩床半空
斑斑枕花殘淚紅君心若車千萬轉妾身如轍移漸遠
碧川淒淒山窈窕馬蹄在耳輪在眼桑間女兒情不淺
莫道野蠶能作繭

近體詩

吳宮曲

日下苑西宮花開香徑紅玉釵斜白燕羅帶弄青蟲皓
齒初含雪柔枝欲斷風可憐傾國艷誰信女為戎

公子行

春色滿城池盃盤著處移鎗金斜雁子鞍帕嫩鶯兒買
笑歌桃葉尋歡折柳枝可憐明月夜長是管絃隨

塞上曲

邊風捲地時日暮帳初移磧迴三通角山寒一點旗連
收榻索馬引滿射雕兒莫道功勲細將軍昔戍師

塞下曲

二十逐嫖姚分兵遠戍遼雪迷經塞夜冰壯渡河朝促
放鵬難下生騎馬未調小儒何足問看取劍橫腰

塞下

萬里配長征連年慣野營入羣來揀馬拋伴去擒生箭
插鵬翎濶弓盤鵲角輕閒看行近遠西去受降城

秋霽

垂老歸休意栖栖巷中暗燈棋子落殘語酒瓶空滴

暮侵簷露虛踈入檻風何妨一蟬嘒自抱木蘭叢

晚夏歸別業

古岼扁舟晚荒園一徑微鳥啼新果熟花落故人稀宿
潤侵苔甃斜陽照竹扉相逢盡鄉老無復話時機

憶雲陽宅

一別雲陽宅深愁度歲華翠濃春檻柳紅滿夜庭花鳥
影垂纖竹魚行踐淺沙聊當因寤寐歸思浩無涯

江城晚眺

重檻構雲端江城四鬱盤
河流出郭靜山色對樓寒
浪草侵天白霜林映日丹
悠然此江思樹杪幾樯竿

江西道中

日落江村遠烟雲度幾重
問人孤驛路驅馬亂山峯
夜入霜林火寒生水寺鐘
淒涼哭途意行處又饑凶

西江江上月遠遠照征衣
夜色草中網秋聲林外機
渚田牛路熟石岸客船稀
無復是鄉井鷓鴣聊自飛

秋灘一望平遠遠見山城
落日懸烏柏空林露寄生
燒

畬殘火色盪槃夜溪聲況是曾游處荒田小變更

夕次桐廬

百里清溪口扁舟此去過晚潮風勢急寒葉雨聲多
出山頭鼓樵通竹裏歌不堪無酒夜迴首夢烟波

松汀驛

山色遠含空蒼茫澤國東海明先見日江白迴聞風
鳥道高原去人烟小徑通那知舊遺逸不在五湖中

洞庭南館

一徑逗霜林朱欄遶碧岑地盤雲夢角山鎮洞庭心樹
白看烟起沙紅見日沈還因此悲屈惆悵又行吟

入潼關

都城三百里雄險此迴環地勢遙尊嶽河流側讓關秦
皇曾虎視漢祖昔龍顏何事梟兇輩干戈自不閒

登廣武原

廣武原西北華夷此浩然地盤山入海河遶郭連天遠
樹千門色高檣萬里船鄉心日云暮猶在楚城邊

題海鹽南館

故人營此地臺館尚依依
黑夜山魈語黃昏海燕歸
舊陰楊葉在殘雨槿花稀
無復南宮賞高簷紅燭輝

題曾氏園林

十畝長堤宅蕭疎半老槐
醉眠風卷簾棋罷月移堦
斫樹遺桑斧澆花濕笋鞋
還將齊物論終歲自安排

題杭州孤山寺

樓臺聳碧岑一徑入湖心
不雨山長潤無雲水自陰
斷

橋荒蘚澀空院落花深猶憶西牕月鐘聲在北林

潤州甘露寺

千重構橫險高步出塵埃日光先到江山勢盡來冷
雲虛水石清露滴樓臺況是東溟上平生意一開

金山寺

一宿金山頂微茫水國分僧歸夜船月龍出曉堂雲樹
影中流見鐘聲兩岸聞因悲在朝市終日醉醺醺

禪智寺

寶殿依山險臨虛勢若吞畫簷齊木末香砌壓雲根遠
景窓中岫孤烟竹裏村憑高聊一望鄉思隔吳門

喜王子載話舊

相逢青眼日相嘆白頭時累話三朝事重看一局棋歡
娛非老大成長是嬰兒且盡樽中物無煩更後期

途中逢李道實游蔡州

征馬漢江頭逢君上蔡游野橋經亥市山路過申州僻
地人行澀荒林虎跡稠殷勤話新守生物賴諸侯

訪許用晦

遠郭日曛曛，停橈一訪君。
小橋通野水，高樹入江雲。
酒興曾無敵，詩情舊逸羣。
怪來音信少，五十我無聞。

送韋整尉長沙

遠道長沙去，憐君屈一官。
風帆彭蠡疾，雲水洞庭寬。
木客提蔬束，江鳥接飯丸。
莫言卑濕地，未必乏新歡。

送沈下賢謫尉南康

秋風江上草，先是客心摧。
萬里故人去，一行新雁來。
山

高雲緒斷浦迴日波顏莫怪南康遠相思不可裁

殘獵

殘獵渭城東蕭蕭西北風雪花鷹背上冰片馬蹄中臂
挂梢荆兔腰懸落箭鴻歸來逞餘勇兒子亂彎弓

題杭州天竺寺

西南山最勝一界是諸天上路穿巖竹分流入寺泉躡
雲丹井畔望月石橋邊洞壑江聲遠樓臺海氣連塔明
春嶺雪鐘散暮松烟何處去猶恨更看峯頂蓮

公子行

玉堂前後畫簾垂立却花驄待出時紅粉美人擎酒勸
錦衣年少臂鷹隨輕將玉板敲花片旋把金鞭約柳絲
晴日獨游三五騎等閒行傍曲江池

愛妾換馬

一面天桃千里蹄嬌姿駿骨價應齊乍牽玉勒辭金棧
催整花鈿出繡閨去日豈無沾袂泣歸時還有頓銜嘶
嬋娟躑躅春風裏揮手搖鞭楊柳堤

綺閣香銷華廐空忍將行雨換追風休憐柳葉雙眉翠
却愛桃花兩耳紅侍讌永辭春色裏趨朝休立漏聲中
恩勞未盡情先盡暗泣長嘶兩意同

題干越亭

扁舟亭下駐烟波十五年遊重此過洲
菑露沙人渡淺樹梢藏竹鳥啼多層欄漲水痕猶在古板題詩字已訛
況是高秋正圓月可堪聞唱異鄉歌

秋夜登潤州慈和寺上方

清夜浮埃歇井鄧塔輪全照露華鮮
人行中路月生海鶴語上方星滿天
樓影半連深岸水鐘聲寒徹遠林烟
僧房閉盡下樓去一半夢魂離世緣

和杜牧之齊山登高

秋溪南岸菊霏霏急管繁絃對落暉
紅葉樹深山逕斷碧雲江淨浦帆稀
不堪孫盛嘲時笑願送王弘醉夜歸
流落正憐芳草在砧聲徒促授寒衣

寓懷寄蘇州劉郎中

一聞周召佐明時西望都門強策羸天子好文才自薄
諸侯力薦命猶奇賀知章口徒勞說孟浩然身更不疑
唯是勝游行未徧欲離京國尚遲遲

感王將軍柘枝妓歿

寂寞春風舊柘枝美人休舞曲停吹鴛鴦鈿帶拋何處
孔雀羅衫付阿誰畫鼓不聞招節拍錦靴空想挫腰肢
今來座上翻如醉曾見梨園教徹時

宮詞

故國三千里深宮二十年一聲河滿子雙淚落君前

此詩

傳入宮禁杜牧酬祜詩云七子論詩誰似公曹劉須在指揮中可憐故國三千里虛唱歌辭滿六宮

自倚能歌日先皇掌上憐新聲何處唱腸斷李延年

白鼻騮

為底胡姬酒長來白鼻騮摘蓮拋水上郎意在浮花

蘇小歌

新人千里去故人千里來剪刀橫眼底方覺淚難裁

牆頭花

蟋蟀鳴洞房梧桐落金井為君裁舞衣天寒剪刀冷
穆護沙

玉管朝朝弄清歌日日新折花當驛路寄與隴頭人
金殿樂

入夜秋砧動千聲起四隣不緣樓上月應為隴頭人
長門怨

日映宮牆柳色寒笙歌遙指碧雲端珠鉛滴盡無心語
強把花枝冷笑看

鄴中懷古

鄴中城下漳河水日夜東流莫記春
腸斷宮中望陵處不堪臺上也無人

寧哥來

日映宮城霧半開太真簾下畏人猜
黃翻綽綽指向西樹不信寧哥回馬來

阿鵲湯

月照宮城紅樹芳綠牕燈影在雕梁
金輿未到長生殿

妃子偷尋阿鵲湯

邠王小管

號國潛行韓國隨宜春深院映花枝金輿遠幸無人見
偷把邠王小管吹

邠娘羯鼓

新教邠娘羯鼓成大酺初日最先呈冬兒指向真真說

一曲乾鳴杖子輕

海錄雜事云明皇宮中有容兒弄鉢頭邠娘羯鼓耍娘歌悖挈兒舞張祐

各有詩云云

耍娘歌

宜春花夜雪千枝
妃子偷行上密
隨便喚耍娘歌一曲
六宮生老是蛾眉

悖挐兒舞

東風南內百花時
道唱梁州急遍吹
搗手便拈金梳舞
上皇驚笑悖挐兒

容兒鉢頭

爭走金車叱鞅牛
笑聲誰是說千秋
兩邊角子羊門裏

猶學容兒弄鉢頭

李謩笛

平時東幸洛陽城
天樂宮中夜徹鳴
無奈李謩偷曲譜
酒樓吹笛是新聲

折楊柳枝

莫折宮前楊柳枝
明皇曾向笛中吹
傷心日暮烟霞起
無限春愁生翠眉

凝碧池邊斂翠眉
景陽樓下綰青絲
那勝妃子朝元閣

玉手和烟弄一枝

玉環琵琶

宮樓一曲琵琶聲滿眼雲山是去程回顧段師非汝意

玉環休把恨分明

玉環者睿宗所御琵琶也明皇置別榻怕覆之未嘗持用祿山犯京上欲

遷幸登華萼樓置酒進玉環命樂工賀懷智取調之又命禪定僧段師彈之段師用皮絃

集靈臺

集靈臺明皇所作雍錄云在華清宮中非漢集靈宮中之臺也

日光斜照集靈臺紅樹花迎曉露開昨夜上皇新授籙

太真含笑入簾來

虢國夫人承主恩
平明騎馬入金門
却嫌脂粉污顏色
淡掃蛾眉朝至尊

華清宮

天闕沉沉夜未央
碧雲仙曲舞霓裳
一聲玉笛向空盡
月滿驪山宮漏長

紅樹蕭蕭閣半開
上皇曾幸此宮來
至今風俗驪山下
村笛猶吹阿濫堆

紀事云驪山小禽名阿濫堆明皇御玉笛採其聲翻為曲且名焉遠近以

笛爭
效之

山遶宮牆處處聲殘紅長綠露華清武皇一日夢不覺
十二玉樓空月明

雨淋鈴

雨淋鈴夜却歸秦猶見張徽一曲新長說上皇垂淚教

月明南內更無人

明皇別錄帝幸蜀南入斜谷屬淋雨
彌旬於道中聞鈴聲與雨相應因採

其聲為雨淋鈴曲以寄恨時梨園樂工張徽善箏從
至蜀都以曲授之洎至德中幸華清宮左右皆非昔人帝
於望京樓令張徽奏
此曲不覺悽愴流涕

退宮人

開元皇帝掌中憐流落人間二十年長說承天門上宴
百官樓下拾金錢

歌喉漸退出宮闈泣話伶官上許歸猶說入時歡聖壽
內人初著五方衣

題金陵渡

金陵津渡小山樓一宿行人自可愁潮落夜江斜月裏
兩三星火是瓜州

晚秋潼關西門作

日落寒郊烟物清
古槐陰黑少人行
關門西去華山色
秦地東來河水聲

題弋陽館

一葉飄然下弋陽
殘霞昏日樹蒼蒼
吳溪漫漶干將劍
却是猿聲斷客腸

獻王智興

十年受命鎮方隅
孝節忠規兩有餘
誰信將壇嘉政外
李陵章句右軍書

紀事云智興鎮徐州見從事會飲賦詩引毫立成祐獻詩頌美左右曰書

生諄辭耳智興叱曰張生一
海內名士篇什豈易得耶

贈竇家小兒

深綠衣裳小小人每來廳裏解相親
天生合去雲霄上一尺松栽已出塵

秋曉送鄭侍御

離鴻聲怨碧雲淨楚瑟調高清曉天
盡日相看俱不語西風搖落數枝蓮

聽崔侍御菖葉家歌

宛羅重縠起歌筵
活鳳生花動碧烟
一聲唱斷無人和
觸破秋雲直上天

聽箏

十指尖尖玉笋紅
雁行輕過翠絃中
分明似說長城苦
水咽雲寒一夜風

耿家歌

十二年前邊塞行
坐中無語嘆歌情
不堪昨夜先垂淚
西出陽關第一聲

塞上聞笛

一夜梅花笛裏飛
冷沙晴檻月光輝
北風吹盡向何處
高入塞雲燕雁稀

平原路上題郵亭殘花

雲暗山橫日欲斜
郵亭下馬對殘花
自從身逐征西府
每到花時不在家

徐凝

凝睦州人元和中官至侍郎

雲谿友議稱白樂天為杭州刺史凝與張祜並詣之求解凝先有題開元寺牡丹詩白到寺看花見其詩賞之命與同醉而歸試訖解送遂以凝為元祜次之祜不服自述題金山詩凝曰美則美矣爭如老夫千古長如白練飛一條界破青山色凝遂擅場杜牧常不平之盛言祜美異於白後蘇東坡目為惡詩洪容齋以為諸絕如辭韓侍郎相思林憶揚州亦皆有情致云

計敏夫云樂天薦凝屈祐論者至今鬱鬱或歸白
之妒才祐元和中作宮體艷詩輕薄之流能其才
合譟得譽其不羈之狀往往間見凝之操履不見
於史然方干學詩於凝贈之詩曰吟得新詩草裏
論戲反其辭謂村裏老也方干世所謂簡古者且
譏凝則凝之朴畧椎魯從可知矣樂天方以實行
求才故薦凝抑祐牧之少年所為亦近於祐為祐
恨白理有之耳

近體詩

題杭州開元寺牡丹

此花南地知誰種，慚愧僧閒用意栽。
海燕解憐頻睥睨，胡蜂未識更徘徊。
虛生芍藥徒勞妒，羞殺玫瑰不敢開。

惟有數苞紅萼在，含芳只待舍人來。

樂天刺杭州日令訪求牡丹獨開元

寺僧惠澄近於京師得之植於庭時春景方深惠澄設油幕覆其上以俟白至會凝自富春來未識白先題詩

云云

廬山獨夜

寒空五老雪斜月九江雲鐘磬知何處蒼蒼樹裏聞

宮中曲

披香侍宴插仙花厭著龍綃著越紗恃賴傾城人不及
檀妝惟約數條霞

身輕入寵盡恩私腰細偏能舞柘枝一日新妝拋舊樣
六宮爭畫黑煙眉

樂府新詩

一聲盧女十三絃早嫁城西好少年不羨越溪歌者苦

采蓮歸去綠牕眠

長慶春

山頭水色薄籠烟
久客新愁長慶年
身上五勞仍病酒
天桃牕下背花眠

八月九月望日雨

八月繁雲連九月
兩回三五晦漫漫
一年悵望秋將盡
不得嫦娥正面看

奉陪相公看花宴會

丞相邀歡事事同
玉簫金管咽東風
百分春酒莫辭醉
明日的無今日紅

木蘭花謝可憐條
遠道音書轉寂寥
春去一年春又盡
幾回空上望江橋

憶揚州

蕭娘臉下難勝淚
桃葉眉頭易得愁
天下三分明月夜
二分無賴是揚州

嘉興寒食

嘉興郭裏逢寒食落日家家拜掃回惟有縣前蘇小小
無人送與紙錢來

題縉雲山鼎池

相傳黃帝
鑄鼎處

黃帝旌旗去不回空餘片石碧崔嵬有時風捲鼎湖浪
散作晴天雨點來

廬山瀑布

虛空落泉千仞直雷奔入海不暫息千古長如白練飛

一條界破青山色

芥隱筆記云凝一條界破青山色句
白公稱之東坡以為塵陋至稱為惡

詩天台山賦瀑布飛流而
界道目為惡詩無所自耶

相思林

遠客遠遊新過嶺每逢芳樹問芳名長林徧是相思樹
爭遣愁人獨自行

自鄂渚至河南將歸江外留辭韓侍郎

一生所遇惟元白天下無人重布衣欲別朱門淚先盡
白頭遊子白身歸

古樹

古樹欹斜臨古道枝不生花腹生草行人不見樹少時
樹見行人幾番老

翫花

麴塵溪上素紅枝影在溪流半落時時人自惜花腸斷
春風却是等閒吹

朱霞燄燄山旆動綠野聲聲杜宇來誰謂蜀王身作鳥
自啼還自有花開

誰家躑躅青林裏半見殷花燄燄枝憶得倡樓人送客

深紅衫子影門時

花到薔薇明艷絕
燕支顆破麥風秋
一番弄色一番退
小婦輕妝大婦愁

楊凝

凝字懋功與兄憑弟凌並負詩名大厯中擢進士
第歷司封員外郎為權幸所忌徙官宣武董晉表
為判官攝行亳州刺史事在幕荒酒遇卒亂還京
拜兵部郎中

近體詩

送客往夏州

憐君此去過居延古塞黃雲共渺然
沙濶獨尋邊馬跡路迷遙指戍人烟
夜投孤店愁吟笛朝望行塵喜控弦
聞有故人今從騎何須著論更言錢

柳絮

河畔多楊柳追遊盡狹斜春風一回送
亂入莫愁家

花枕

席上沈香枕樓中蕩子妻那堪一夜裏長溼兩行啼

楊衡

衡字仲師吳興人初與符載崔羣宋濟隱廬山號
山中四友後登第官至大理評事

古體詩

白紵辭

玉纓翠珮雜輕羅香汗微漬朱顏酡為君起唱白紵歌
清聲裊雲思繁多凝笳哀瑟時相和金壺半傾芳夜促

梁塵霏霏暗紅燭令君安坐聽終曲墜葉飄花難再復
費冠卿

冠卿字子軍池州人登元和二年進士第會母卒
嘆曰干祿養親耳得祿而親喪何以祿為遂歸隱
九華山長慶中殿院李行修舉其孝行以右拾遺
召不赴

近體詩

答蕭建問九華山

自地上青峰懸崖一萬重
踐危頻側足登塹半齊胸
飛狖啼攀桂遊人喘倚松
入林寒痺痺近暴雨濛濛
徑滑石稜上寺開山掌中
幡花撲淨地臺殿印晴空
勝景層層別高僧院院逢
潛魚候洗鉢老獼戲撞鐘
外戶憑雲掩中廚課水舂
搜泥時和麵拾橡半添種
渡壑緣槎濟持燈入洞窮
夾天開壁峭透石蹙波雄
澗藹清無土潭深碧有龍
畬田一片淨谷樹萬株濃
野客登臨慣山房幽寂同
寒爐樹根火夏牖竹梢風
邊鄙籌賢相黔黎託

聖躬君能棄名利歲晏一相逢

閒居即事

生計唯將三尺僮學他賢者隱牆東
照眠夜後多因月掃地春來祇藉風
幾處紅旗驅戰士一園青草伴衰翁
子房仙去孔明死更有何人解指蹤

沈亞之

亞之字下賢吳興人元和十年舉進士
辟涇原李彙幕長慶中累遷殿中丞御史
內供奉太和初李

同捷反副行營使栢耆為判官耆擒同捷赴京諸
將害功論列耆坐貶亞之亦貶尉南康後終郢州
掾亞之以文詞得名嘗遊韓愈之門當時李賀杜
牧皆稱許之

古體詩

村居

有樹巢宿鳥無酒共客醉月上蟬韻殘梧桐陰繞地獨
出村舍門吟劇微風起蕭蕭蘆荻叢叫嘯如山鬼應緣

我憔悴為我哭秋思

近體詩

春色滿皇州

何處春輝好偏宜在雍州
花明夾城道柳暗曲江頭
風軟遊絲重光融瑞氣浮
鬪雞憐短草乳燕傍高樓
繡轂盈香陌新泉溢御溝
迴看日欲暮還騎似川流

題候仙亭

新剏仙亭覆石壇
雕梁峻宇入雲端
嶺北嘯猿高枕聽

湖南山色卷簾看

蔣防

防義興人官右拾遺李紳元稹保薦以司封郎中
知制誥進翰林學士李逢吉逐紳因出之為汀州
刺史

常州志防年十八父友令作秋河賦援筆立就于
簡遂妻以女

近體詩

春風扇微和

麗日催遲景和風扇早春
暖浮丹鳳闕韶媚黑龍津
澹蕩迎仙仗霏微送畫輪
綠搖官柳散紅待禁花新
舞席皆迴雪歌筵暗送塵
幸當陽律候惟願及佳辰

熊孺登

孺登鍾陵人登進士第元和中終藩鎮從事劉白俱有詩往還執易其從姪也

近體詩

湘江夜泛

江流如箭月如弓行盡三湘數夜中
無奈子規知向蜀一聲聲似怨春風

贈靈徹上人

詩句能生世界春僧家更有姓湯人
況聞暗憶前朝事知是修行第幾身

與左興宗溫城別

江逢九派人將別猿到三聲月為愁
不知相見更何日

此夜少年堪白頭

于武陵

武陵會昌時詩人也登大中進士

近體詩

贈賣松人

入市雖求利憐君意獨真欲將寒澗樹賣與翠樓人
瘦葉幾經雪淡花應少春長安重桃李徒染六街塵

山中桂

日暖上山路鳥啼知己春忽逢幽隱樹如見獨醒人石
冷開常晚風多落已頻樵夫應不識歲久伐為薪

西還

不繫與舟閒悠悠吳楚間羞將新白髮却對舊青山一
葉初飛樹幾人同入關長安家尚在秋至又西還

夜與故人別

白日去難駐故人非舊容今宵一別後何處復相逢過
楚水千里到秦山幾重語來天又曉月落滿城鐘

孤雲

南北各萬里有雲心更閒因風離海上伴月到人間洛
浦少高樹長安無舊山徘徊不可駐漠漠更東還

勸酒

勸君金屈卮滿酌不須辭花發多風雨人生足別離

御定全唐詩錄卷七十

欽定四庫全書

御定全唐詩錄卷七十一

李德裕

德裕字文饒趙郡人元和宰相吉甫子也以蔭補校書郎河東張弘靖辟為掌書記府罷召拜監察御史穆宗即位擢翰林學士再進中書舍人未幾授御史中丞始吉甫相憲宗牛僧孺李宗閔對直言策痛詆當路吉甫訴於帝且泣有司皆得罪遂

與爲怨吉甫又爲帝謀討兩河叛將李逢吉沮解其言功未既而吉甫卒裴度實繼之逢吉以議不合罷去故追銜吉甫而怨度擯德裕不得進至是間帝暗傭誅度使與元稹相怨奪其宰相而已代之欲引僧孺益樹黨乃出德裕爲浙西觀察使俄而僧孺入相由是牛李之憾結矣太和三年召拜兵部侍郎裴度薦才堪宰相而李宗閔以中人助先秉政且得君出德裕爲鄭滑節度使引僧孺協

力罷政事二怨相濟凡德裕所善悉逐之踰年徙
劍南西川以兵部尚書召俄拜中書門下平章事
封贊皇縣伯宗閔罷代爲中書侍郎集賢殿大學
士鄭注李訓怨之即復召宗閔輔政拜德裕爲興
元節度使入見帝自陳願留闕下復拜兵部尚書
宗閔已行不可止更徙鎮海軍以代王璠璠與李
漢謭之貶爲太子賓客分司東都復貶袁州刺史
未幾宗閔以罪斥而注訓等亂敗乃徙滁州刺史

又以太子賓客分司東都開成初起爲浙西觀察使德裕三在浙西出入十年遷淮南節度使武宗立召爲門下侍郎同中書門下平章事尋冊拜司空策功拜太尉進封趙國公改衛國公當國凡六年威名獨重於時宣宗即位德裕奉冊太極殿帝退謂左右曰向行事近我者非太尉耶每顧我毛髮爲森豎翼日罷爲檢校司徒同中書門下平章事荆南節度使俄徙東都留守白敏中令狐綯使

黨人斥德裕陰事故以太子少保分司東都再貶潮州司馬明年貶崖州司戶叅軍事德裕少力學善爲文雖在大位手不去書本傳云德裕自鎮浙西迄淮甸有詩人劉三復者常叅佐賓筵軍政之餘與吟詠終日其論文曰沈休文以音韻爲切重輕爲難語雖甚工旨則未遠未可以言文外意也古之辭高者蓋以言妙而工適情不取於音韻意盡而止成篇不拘於隻耦故篇無足尤詞寡累句

古辭如金石琴瑟尚於至音今則如絲竹鞀鼓迫於促節即知聲律之爲其弊也又曰世有非文章者曰詞不出於風雅思不越於離騷模寫古人何足貴也余曰譬如日月雖終古常見而光景常新此所以爲靈物者也嘗爲文箴曰文之爲物自然靈氣恍惚而來不思而至杼軸得之淡而無味琢刻藻績彌不足貴如彼璞玉錯以金翠美質旣彫良寶斯棄其大旨如此

紀事云德裕營平泉莊遠方以異物奉之或題曰隴右諸侯供語烏日南太守送名花及譴責或作詩云畫閣不開梁燕去朱門罷掃乳烏歸千巖萬壑應惆悵流水斜傾出武關

北夢瑣言云李德裕幼而神俊憲宗賞之坐於膝上父吉甫每以敏辨誇於同列武元衡召之問曰吾子所嗜何書意欲探其志也德裕不應翼日元衡以告吉甫因戲曰公誠大癡耳吉甫歸責之德

裕曰武公身爲帝弼不問理國調陰陽而問所嗜
書者禮部成均之職也其言不當所以不應吉甫
復告元衡大慚由是振名

撫言云德裕頗爲寒素開路及謫官南去或有詩
曰八百孤寒齊下淚一時回首望崖州

劇談錄德裕東都平泉莊去洛城三十里卉木臺
榭若造仙府有虛檻對引泉水縈回疏鑿像巫峽
洞庭十二峰九派迄於海門江山景物之狀以間

行徑有平石以手摩之皆隱隱雲霞龍鳳草樹之
形自爲記記所有奇花異木之品又爲記戒子孫
鬻平泉及以平泉一樹一石與人非吾子孫也

古體詩

自敘

非尚子遍
游五嶽

五嶽逕雖深遍遊心已蕩苟能知止足所遇皆清曠七
十難可期一丘乃微尚遙懷少室山常恐非吾望

夏晚有懷平泉林居

宜春
作

孟夏首畏途捨舟在徂暑愀然何所念念我龍門塢密
竹無蹊徑高松有四五飛泉鳴樹間颯颯如度雨茵桂
秀層巔芳蓀媚幽渚稚子候我歸衡門獨延佇誰言聖
與哲曾是不懷土公旦旣思周宣尼亦念魯矧余竄炎
裔日夕誰晤語眷闕悲子牟班荆感椒舉悽悽視環玦
惻惻步庭廡豈待莊舄吟方知倦羈旅

清明後憶山中

遙思寒食後野老林下醉月照一山明風吹百花氣飛

泉與萬籟髣髴疑簫吹不待曙華分已應喧鳥至

懷山居邀松陽子同作

我有愛山心如饑復如渴出谷一年餘常疑十年別春
思巖花爛夏憶寒泉冽秋憶泛蘭卮冬思翫松雪晨思
小山桂暝憶深潭月醉憶剖紅梨飯思食紫鱖坐思藤
蘿密步憶莓苔滑晝夜百刻中愁腸幾回絕每念羊叔
子言之豈常輟人生如意事十乃居七八我未及懸輿
今猶佩朝紱焉能逐麋鹿便得遊林樾范恣滄波舟張

惟赤松列惟應詎身恤豈敢忘巨節器滿自當歆物盈
終有缺從茲返樵逕庶可希前哲

思在山居日偶成此詠邀松陽子同作

閒思昔歲事忽忽念伊川垂月步秋坂滿山聞石泉回
塘碧潭映高樹綠蘿懸露下叫田鶴風來嘶晚蟬懷茲
長在夢歸去且無緣幽谷人未至蘭若應更鮮

思鄉園老人

常羨華門翁所思惟歲稔遙知松月曙尚在山牕寢蘭

氣入幽簾禽言傍孤枕晨興步巖逕更酌寒泉飲

憶平泉山居贈沈吏部

昔聞羊叔子茆屋在東渠豈不念歸路裴徊畏簡書乃
知軒冕客自與田園疎沒世有遺恨精誠何所如嗟予
寡時用夙志在林間雖抱山水癖敢希仁智居清泉繞
舍下修竹蔭庭除幽徑松蓋密小池蓮葉初從來有好
鳥近復躍鯁魚少室映川陸鳴臯對蓬廬張何舊寮案
余與吏部乃相勉在懸輿常恐似伯玉瞻前慙魏舒
金門寮故也

比聞龍門敬善寺有紅桂樹獨秀伊川嘗於江南
諸山訪之莫致陳侍御知予所好因訪剡溪樵
客偶得數株移植郊園衆芳色沮乃知敬善所
有是蜀道茵草徒得嘉名因賦是詩無贈陳侍

御

金陵作

昔聞紅桂枝獨秀龍門側越叟遺數株周人未嘗識平
生愛此樹攀玩無由得君子知我心因之爲羽翼豈煩
嘉客譽且就清陰息來自天姥岑長疑翠蘭色芬芳世

所絕偃蹇枝漸直瓊葉潤不彫珠英粲如織猶疑翡翠
宿想待鵲雛食寧止暫淹留終當更封植

早秋龍興寺江亭閒眺憶龍門山居寄崔張舊從

事

宜春作

江亭感秋至蘭徑悲露泣秔稻秀晚川杉松蔚晴巘嗟
予有林壑茲夕念原衍綠篠連嶺多青莎近溪淺淵明
菊猶在仲蔚蒿莫剪喬木粲凌苔陰崖積幽蘚遙思伊
川水北渡龍門峴蒼翠雙闕間逶迤清灘轉故人在鄉

國歲晏路悠緬惆悵此生涯無由共登踐

鴛鴦篇

君不見昔時同心人化作鴛鴦鳥和鳴一夕不暫離交
頸千年尚爲少二月草霏霏山櫻花未稀金塘風日好
何處不相依既逢解佩游女更值凌波宓妃精光搖翠
蓋麗色映珠璣雙影相伴雙心莫違淹留碧沙上蕩漾
洗紅衣春光今宛轉嬉遊分未返宿莫近天泉池飛莫
近長洲苑爾願歡愛不相忘須去人間羅網遠南有瀟

湘洲且為千里遊洞庭無苦寒沅江多碧流昔為薄命
妾無日不含愁今為水中鳥頡頏自相求洛陽女兒在
青閣二月羅衣輕更薄金泥文彩未足珍畫作鴛鴦始
堪着亦有少婦破瓜年春閨無伴獨嬋娟夜夜學織連
枝錦織作鴛鴦人共憐悠悠湘水濱清淺漾初蘋菖花
發艷無人識江柳逶迤空自春唯憐獨鶴依琴曲更念
孤鸞隱鏡塵願作鴛鴦被長覆有情人

近體詩

秋日登郡樓望贊皇山感而成詠

昔人懷井邑爲有掛冠期
顧我飄蓬者長隨泛梗移
越吟因病感潘鬢人愁悲
北指邯鄲道應無歸去期

漢州月夕游房公西湖

丞相鳴琴地何年閉玉徽

房公以好琴聞海內

偶因微月夕重敞

故樓扉桃李蹊空在芙蓉客暫依

南史安陸侯與王仲寶長史庾杲之書稱

泛淶水依芙蓉何其麗也

誰憐濟川楫長與夜舟歸

秋日美晴郡樓間眺寄荆南張書記

高檻涼風起清川旭景開秋聲向楚去爽氣自山來
外鴻初返簷間鶩已歸不因烟雨夕何處夢陽臺

寄茅山孫鍊師

何地最脩然華陽第八天松風清有露蘿月淨無烟乍

警瑤壇鶴時嘶玉樹蟬欲馳千里思惟戀鳳門泉

茅山志句

曲金陵地肺土良水清作井正似長安鳳門外井水味當是洞泉遠通耳

遙傷茅山孫尊師

蟬脫遺虛白蛻飛入上清同人悲劍解舊友覺衣輕黃

鵠遙將舉斑麟儼未行惟應鮑靚室中夜識琴聲

金格期初至飈輪去不停山摧武擔石天墮少微星
弟子悲徐甲門人泣蔡經空聞留玉鳥猶在阜鄉亭

空宇留丹竈層霞被羽衣舊山聞鹿化遺鳥尚鳬飛數

日奇香在何年白鶴歸想君遊下泊方歎里閭非

按茅山志

下泊宮在中茅西大司命君昇舉來句曲
立郊舍以候二弟處也集舊作下汨正之

洛中士君子多以平泉見呼愧獲方外之名因以

此詩爲報奉寄劉賓客

非高柳下逸自愛竹林間才異居東里愚因在北山徑
荒寒未掃門設畫長闕不及鴟夷子悠悠烟水間

余所居平泉村舍近蒙韋常侍大尹特改嘉名因
寄詩以謝

未謝留侯疾常懷仲蔚園閒謠紫芝曲歸夢赤松村忽
改蓬蒿色俄吹黍谷暄多慚孔北海傳教及衡門

山信至說平泉別墅草木滋長地轉幽深悵然思
歸復此作

忽聞樵客語暫慰野人心幽徑芳蘭密閒庭秀木深麝
麝來澗底鳬鵲遍川潯誰念滄溟上歸歟起歎音

初夏有懷山居

山中有所憶夏景始清幽野竹陰無日巖泉冷似秋翠

岑當累榭皓月入輕舟只有思歸夕空簾且夢游

德裕
于伊

閩南置平泉別墅從官蒲服出將入相三
十年未嘗游居而題寄歌詩皆銘之於石

憶晚眺

伊川新雨霽原上見春山維嶺晴虹斷龍門宿鳥還牛

羊平野外桑柘夕烟間不及鄉園叟悠悠盡日間

憶春耕

郊外杏花拆林間布穀鳴原田春雨後谿水夕流平野
老荷蕞至和風吹草輕無因共沮溺相與事巖畊

憶春雨

春鳩鳴野樹細雨入池塘潭上花微落谿邊草更長梳
風白鷺起拂水綵鴛翔最羨歸飛鷺年年在故鄉

憶初暖

今日初春暖山中事若何雪開喧鳥至漸散躍魚多幽
翠生松栢輕烟起薜蘿柴扉常晝掩惟有野人過

憶村中老人春酒

有劉楊二
叟善釀

二叟茅茨下清晨飲濁醪雨殘紅芍藥風落紫櫻桃巢
鶯銜泥疾簷蟲掛網高閒思春谷事轉覺宦途勞

憶茗芽

谷中春日暖漸憶掇茶英欲及清明火能銷醉客醒松
花飄鼎泛蘭氣入甌輕飲罷閒無事捫蘿谿上行

寒食日三殿侍宴奉進詩一首

宛轉龍蛇節參差燕羽高
風光搖禁柳霽色暖宮桃
春露明仙掌晨霞照錦袍
雪凝陳組練林植聳干旄
廣樂

初踰鳳神仙欲抃黿鳴笳
朱鷺起疊鼓紫駢豪象舞
嚴

金鎧豐歌耀寶刀不勞孫子法自得太公韜

已上四句
奉述內樂

破陣
樂

分席羅玄冕行觴舉綠醪
殷中時落羽幢末乍升

孫瑞景開陰翳薰風散鬱陶
天顏歡益醉臣節勁尤高
楛矢方來貢雕弓已載橐
英威揚絕漠神算盡臨洮
赤

縣陽和布蒼生雨露膏野平惟有麥田闢久無蒿祿秩
榮三事功勲之一毫寢謀慙汲黯秉羽貴孫敖煥若遊
玄圃歡如享太牢輕生何以報祇自比鴻毛

述夢詩四十韻

有序

去年七月溽暑之後驪降其夕五鼓未盡涼風
淒然始覺枕簟微冷俄而假寐斯熟忽夢賦詩
懷禁掖舊遊凡四十餘韻初覺尚憶其半經時
悉已遺忘今屬歲杪無事羈懷多感因綴其所

遺爲述夢詩以寄一二僚友

賦命誠非薄良時幸已遭君當堯舜日官接鳳凰曹目

睇烟霄濶心驚羽翼高

此六句夢中作

椅梧連鶴禁脾晚接龍

韜

內署北連春宮西接羽林軍

我后憐詞客

先朝曾宣諭卿等是我門客

吾寮並

雋髦著書同陸賈待詔比王褒重價連玄璧英辭淬寶

刀泉流初落澗

文賦稱言泉流於齒吻

露滴更濡毫赤豹忻來獻

彤弓喜暫橐

時西戎乞盟幽鎮二帥束身赴闕海內無事者累月詩稱赤豹黃熊蓋蠻貊之貢物

非烟含瑞氣馴雉潔霜毛靜室便幽獨虛樓散鬱陶

學士

各有一室西垣有小樓時燕語於此

花光晨艷艷松韻晚騷騷畫壁看飛

鶴山圖見巨鼇

內署垣牆皆有画松鶴先是西壁画海內曲龍山憲宗欲臨幸中使懼而塗焉

倚簷陰藥樹落格蔓葡萄

此八句悉是內署物色唯曾遊者依然可想也

荷靜

蓬池膾冰寒郢水醪

每學士初上賜食皆蓬萊池魚膾夏至後頒賜水及燒香酒以酒味

稍濃常和冰而飲禁中有郢酒坊也

荔枝來自遠盧橘賜常叨

先朝初臨御南方曾

獻荔枝亦蒙頒賜

麝氣隨蘭澤霜華入杏膏恩光唯覺重攜挈

未為勞

此八句以述恩賜每有賜與常攜挈而歸

夕閱梨園騎宵聞禁仗葵

每梨園獵回或抵暮夜院門常見歸騎

扇迴交綵翟雕起颺金條轡待素

絲攬書期蜀客操盡規常蹇蹇退舍尚忉忉

此八句述內庭所觀

龜顧垂金鈕鸞飛曳錦袍

曾蒙賜錦袍曳者蓋取詩人不曳不婁之義也

御溝

楊柳弱天廐驕驕豪

學士皆蒙借飛龍馬

屢換青春直閒隨上苑

遨

普濟寺與芙蓉院相連常所游眺芙蓉亦謂之南苑也

烟低行殿竹風折繞垣

桃

此八句述沐浴日遊戲

聚散俄成昔悲愁益自熬每懷仙駕遠

更望茂陵號地接三茅嶺川迎伍子濤

代稱海濤是伍子胥憤氣所作

花迷瓜步暗石固蒜山牢

此兩句是夢中所作

蘭野凝青管梅洲

動翠篙泉魚驚彩仗溪鳥避干旄感舊心猶絕思歸首

更搔無聊燃蜜炬誰復勸金舳

余自到此絕無夜晏酒器中大者呼為舳賓僚

乃常顧形迹未嘗以此而相勸也

嵐氣朝生棟城陰暝入濠望煙歸海

嶠送鴈渡江臯宛馬嘶寒櫪吳鈞在錦段未能追狡兔
空覺長江蒿水國逾千里風帆過萬艘閱川終古恨唯
見暮滔滔

故人寄茶

一作曹鄴

劍外九華英緘題下玉京開時微月上碾處亂泉聲半
夜邀僧至孤吟對竹烹碧流霞腳碎香泛乳花輕六腑

睡神去數朝詩思清其餘不敢費留伴讀書行

謫仙嶺道中作

嶺水爭分路轉迷
枕榔椰葉暗蠻溪
愁衝毒霧逢蛇草
畏落沙蟲避燕泥
五月畬田收火米
三更津吏報潮雞
不堪腸斷思鄉處
紅槿花中越鳥啼

無題

松倚蒼崖老蘭臨碧澗衰
不勞鄰舍笛吹起舊時悲

長安秋夜

內官傳詔問戎機載筆金鑾夜始歸萬戶千門皆寂寂
月中清露點朝衣

懷京國

海上東風犯雪來臘前先折鏡湖梅遙思禁苑青春夜
坐待宮人畫詔回

登崖州城作

獨上高樓望帝京鳥飛猶是半年程青山侶欲留人住

百匝千遭遶郡城

南部新書崖州郡有北亭子謂之望
闕亭李太尉每登臨未嘗不北睇悲

咽有云今傳太尉崖州詩皆
仇家所作只此一首親作

牛僧孺

僧孺字思黯隴西人貞元中第進士歷相穆敬兩
朝封奇章郡公後出鎮鄂渚文宗朝徵入再相夙
與李贊皇相惡會昌中分司東都貶循州長史大
中初還爲太子少師

近體詩

和樂天除夜

惜歲歲今盡少年應不知淒涼數流輩歡喜見孫兒暗減一身力潛添滿鬢絲莫愁花笑老花自幾多時

李蘇州遺太湖石奇狀絕倫因題二十韻奉呈夢

得樂天

胚渾何時結嵌空此日成掀蹲龍虎鬪挾怪鬼神驚帶雨新冰淨輕敲碎玉鳴攬叉鋒刃簇縷絡釣絲縈近水搖奇冷依松助澹清通身鱗甲隱透穴洞天明醜凸隆胡準深凹刻兇觥雷風疑欲變陰黑訝將行噤瘳微寒

早輪囷數片橫地祇愁墊壓鰲足困支撐珍重姑蘇守
相憐嬾慢情爲探湖裏物不怕浪中鯨利涉餘千里山
河僅百程池塘初展見金玉自凡輕側眩魂猶悚周觀
意漸平似逢三益友如對十年兄旺興添魔力消煩破
宿醒嬾人當綺皓視秩即公卿念此園林寶還須別識
精詩仙有劉白爲汝數逢迎

本傳云僧孺留守洛都築第於歸仁里嘉禾怪石置

之堦庭館宇清華竹木幽邃常與詩人白居易吟咏其間

席上贈劉夢得

粉署爲郎四十春
今來名輩更無人
休論世上昇沉事
且鬪樽前見在身
珠玉會應成咳唾
山川猶覺露精神

莫嫌恃酒輕言語
曾把文章謁後塵

雲溪友議云僧孺赴舉之秋嘗投贄

於劉補闕禹錫對客展卷飛筆塗竄其文歷二十餘歲
劉轉汝州公鎮淮南枉道駐旌信宿酒酣賦詩劉方悟
往年改公文卷
僧孺贈詩云

王涯

涯字廣津太原人貞元中擢進士舉宏詞爲翰林
學士起居舍人元和間從謫籍召知制誥拜相尋

罷守兵部出鎮文宗嗣位召為太常復拜相甘露
之變為宦官仇士良所族涯博學好古能為文藏
書數萬卷及名畫法書籤軸之盛侔於天府

初涯與張仲素令狐楚為舍人同編其五七言絕
句為三舍人集其本尚存故絕句較他體獨多

近體詩

春江曲

搖漾越江春相將看白蘋歸時不覺夜出浦月隨人

家寄清江岼征人幾歲遊不知潮水信每月到沙頭

閨思

洞房今夜月如練復如霜爲照離人恨亭亭到曉光

閨人寄遠

花明綺陌春柳拂御溝新爲報遼陽客流芳不待人
遠成功名薄幽閨年貌傷粧成對春樹不語淚千行
鶯啼綠樹深燕語雕梁晚不省出門行沙場知近遠
形影一朝別煙波千里分君看望君處祇是起行雲

宮詞

內人宜着紫衣裳
冠子梳頭雙眼長
新睡起來思舊夢
見人忘却道勝常

春來新插翠雲釵
尚着雲頭踏殿鞋
欲得君王回一顧
爭扶玉輦下金階

五更初起覺風寒
香炷燒來夜已殘
欲捲珠簾驚雪滿
自將紅燭上樓看

各將金鎖鎖宮門
院院青娥待至尊
頭白監門掌來去

問誰頻是最承恩

夜久盤中蠟滴稀金刀剪起盡霏霏傳聲總是君王喚
紅燭臺前着舞衣

箏翻禁曲覺聲難玉柱皆非舊處安記得君王曾道好
長因下輦得先彈

一叢高鬢綠雲光宮樣衣衫淡淡黃爲看九天公主貴
外邊爭學內家妝

宜春院裏駐仙輿夜宴笙歌總不如傳說金箋題寵號

鐙前御筆與新書

永巷重門漸半開
宮官著鎖隔門回
誰知曾笑他人處
今日將身自入來

春風簾裡舊青娥
無奈新人奪寵何
寒食禁花開滿樹
玉堂終日閉時多

碧繡簷前柳散垂
守門宮女欲攀時
曾經玉輦從容處
不敢臨風折一枝

鴉飛深在禁城牆
多遠重樓複殿旁
時向春簷瓦溝上

散開雙翅占朝光

白雪獨免拂地行慣眠紅毯不曾驚深宮更有何人到
只曉金階吠晚螢

百尺仙梯倚閣邊內人爭下擲金錢風來競看銅烏轉
遙指朱竿在半天

春風擺蕩禁花枝寒食鞦韆滿地時又落深宮石渠裏
盡隨流水入龍池

彫牆不斷接宮城金栊皆書殿院名萬轉千迴相隔處

各調絃管對聞聲

霏霏春雨九重天
漸暖龍池御柳煙
玉輦遊時應不避
千廊萬屋自相連

禁門煙起紫沈沈
樓閣當中複道深
長到暮天凝不散
掖庭宮裏動秋砧

炎炎夏日滿天時
桐葉交加覆玉墀
向晚移鐙上銀簾
叢叢綠鬢坐彈碁

曠曠日出大明宮
天樂遙聞在碧空
禁樹無風正和暖

玉樓金殿曉光中

迥出芙蓉閣上頭
九天懸處正當秋
年年七夕晴光裏
宮女穿針盡上樓

教來鸚鵡語初成
久閉金籠慣認名
總向春園看花去
獨於深院喚人聲

銀瓶瀉水欲朝妝
燭焰紅高粉壁光
共怪滿身珠翠冷
黃花瓦上有新霜

迎風殿裏罷雲和
起聽新蟬步淺莎
為愛九天和露滴

萬年枝上最聲多

御果收時屬內官
傍簷低壓玉闌干
明朝摘向金華殿
盡日枝邊次第看

內裏松香滿殿聞
四行階下暖氤氲
春深欲去黃金粉
繞樹宮娥着絳裙

禁樹傳聲在九霄
內中殘火獨遙遙
千官待取門猶閉
未到宮前下馬橋

漢苑行

二月春風變柳條九天清樂奏雲韶蓬萊殿後花如錦
紫閣街前雪未消

迴雁高飛太液池新花低發上林枝年光到處皆堪賞
春色人間總不知

春風澹澹影悠悠鶯囀高枝燕入樓千步回廊聞鳳吹
珠簾處處上銀鈎

塞下曲

三戍漁陽再渡遼
驛弓在臂劍橫腰
匈奴似欲知名姓

休傷陰山更射鵰

朔雪飄飄開雁門
平沙歷亂卷蓬根
功名恥計擒生數
直斬樓蘭報國恩

陰磧茫茫塞草腓
桔槔原上暮烟飛
關河北望天連海
蘇武曾將漢節歸

秋夜曲

丁丁漏永夜何長
漫漫輕雲露月光
秋逼暗蟲通夕響
寒衣未寄莫飛霜

桂魄初生秋露微
輕羅已薄未更衣
銀箏夜久殷勤弄
心怯空房不忍歸

閨人春思

愁見游空百丈絲
春風挽斷更傷離
桃花落盡青苔地
盡日無人誰得知

秋思

網軒涼吹動輕衣
夜聽更長玉漏稀
月度天河光轉溼
鵲驚秋樹葉頻飛

宮連太液見滄波暑氣微消秋意多一夜輕風蘋末起
露珠翻盡滿池荷

舒元興

元興婺州人元和中登進士第文宗朝轉監察御史
歷御史中丞以刑部侍郎同平章事甘露之變
爲左軍所族

本傳元興性詭激與李訓善訓引爲相以謀誅宦
官熒主聽致決裂皆二人爲之諸相王涯賈餗實

不知也初元輿爲牡丹賦時稱其工死後帝一日
凭殿欄觀牡丹誦其警句忽省是元輿詞爲泣下
古體詩

坊州按獄

中部接戎塞頑山四周遭風冷木長瘦石磽人亦勞牧
守苟懷仁養之時爲瘞其愛如赤子始得無啼號奈何
貪狼心潤屋沉脂膏攫搏如猛虎吞噬若狂獃山禿逾
高採水窮益深撈龜魚旣絕跡鹿兔無遺毛氓苦稅外

緡吏憂笑中刀大君明四目燭之洞秋毫眷茲一州命
慮齊隆波濤臨軒詔小臣汝往窮貪饕分明舉公法爲
我緩窮騷小臣誠小心奉命如煎熬飲冰不待夕驅馬
凌晨臯及此督簿書游魂出狴牢門墻見狼狽案牘聞
腥臊探情與之言變態如姦獠真非旣巧飾僞意乃深
韜去惡猶農夫稂莠須耘薶恢恢布疎網罪者何由逃
自顧孱鈍安利器非能操六旬始歸奏霜落秋原蒿寄
謝守土臣努力清郡曹須知聽甚卑勿謂天之高

坊州按獄蘇氏莊記室二賢自鄜州走馬相訪留
連數日發後獨坐寂寞因成詩寄之

十年一相見世路信多岐雲雨易分散山川長間之我
街鳳闕恩按獄橋山陞君在龍驤府掌奏羽檄詞相去
百餘里魂夢自相馳形容在胷臆書札通相思煩君愛
我深輕車忽載脂塞門秋色老霜氣方凝姿此地少平
川岡阜相參差誰知路非遠行者多云疲君能犯勁風
信宿凌歊危情親不自倦下馬開雙眉相對坐沉吟屈

指驚歲時萬事且莫問一盃欣共持陽烏忽西傾明蟾
掛高枝捲簾引瑤玉滅燭臨霜墀中庭有疎蘆淅淅聞
風吹長河卷雲色凝碧無瑕疵一言開我懷曠然澹希
夷悠悠夜方永冷思偏相宜睂睫無他人與君閒解題
陶然叩寂寞更請吟清詩得意且忘言何況竹與絲頃
刻過三夕起坐輕四肢明朝告行去慘然還別離出門
送君去君馬揚金羈迴來坐空堂寂寞無人知重重碧
雲合何處尋佳期

近體詩

贈潭州李尚書

湘江舞罷忽成悲，便脫蠻靴出絳帷。誰是蔡邕琴酒客，

魏公懷舊嫁文姬。

雲溪友議：李翱在長沙有故韋中丞愛姬所生女，流落爲妓，翱憫之，擇士

人嫁焉。元輿自京馳詩贈翱。

章孝標

孝標桐廬人家，錢塘登元和十四年進士第，初除

秘書省正字。太和中，辟山南東道從事，試大理評

事

紀事云桐廬前有八元後有孝標登第復同姓而

官皆不達

近體詩

歸海上舊居

鄉路繞蕪葭縈紆出海涯
人衣披蜃氣馬跡印鹽花草
沒題詩石潮摧坐釣槎
還歸舊窓裏凝思向餘霞

西山廣福院

野寺孤峰上危樓聳翠微捲簾滄海近洗鉢白雲飛竹
影臨經案松花點衲衣日斜登望處湖畔一僧歸

田家

田家無五行水旱卜蛙聲牛犢垂春放兒孫候暖耕池
塘烟未起桑柘雨初晴歲晚香醪熟村村自送迎

少年行

平明小獵出中軍異國名香滿袖薰畫榼倒懸鸚鵡觜
花衫對舞鳳凰文手攏白馬嘶春雪臂竦青骹入暮雲

落日胡姬樓上飲
風吹簫管滿城聞

貽美人

諸侯帳下慣新妝
皆怯劉家薄媚娘
寶髻巧梳金翡翠
羅裙宜著繡鴛鴦
輕輕舞汗初沾袖
細細歌聲欲遶梁
何事不歸巫峽去
故來人世斷人腸

柘枝

柘枝初出鼓聲招
花鈿羅衫聳細腰
移步錦韉空綽約
迎風繡帽動飄飄
亞聲踏節鸞形轉
背面羞人鳳影嬌

祇恐相公看未足便隨風雨上青霄

淮南李相公席上賦春雪

六出花飛處處飄粘窓着砌上寒條朱門到曉難盈尺

盡是三軍喜氣消

撫言云李紳鎮揚州請孝標賦春雪詩命題於臺盤上孝標唯然索筆一

揮云

歸燕詞辭工部侍郎

舊壘危巢泥已落今年故向社前歸連雲大厦無棲處

更傍誰家門戶飛

古今詩話云孝標元和十三年下第時輩多為詩以刺主司獨孝標為歸

燕詞留獻侍郎庾承宣庾得詩展轉吟諷
恨其遺落來年又重典禮曹孝標登第

贈陸暢浙西進詩除官

帝城雲物得陽春水國煙花失主人
昨日天風吹樂府
六宮絲管一時新

李廓

廓宰相程之子登元和進士第以詩名聞於時累
官潁州刺史大中末終武寧節度使

古體詩

雞鳴曲

星稀月沒入五更膠角角雞初鳴
征人牽馬出門立
辭妾欲向安西行再鳴引頸簷頭下
月中角聲催上馬
纔分地色第二鳴旌旆紅塵已出城
婦人上城亂招手
夫婿不聞遙哭聲長恨雞鳴別時苦
不遣雞棲近窗戶

鏡聽詞

匣中取鏡辭竈王羅衣掩盡明月光
昔時長着照容色
今夜潛將聽消息
門前地黑人來稀
無人錯道朝夕歸

更深弱體冷如鐵繡帶菱花懷裏熱銅片銅片如有靈
願得照見行人千里形

近體詩

長安少年行

金紫少年郎繞堦鞍馬光身從左中尉官屬右春坊
戴揚州帽重薰異國香垂鞭踏青草來去杏園旁

追逐輕薄伴閒遊不着緋長攏出獵馬數換打毬衣
曉日尋花去春風帶酒歸青樓無晝夜歌舞歇時稀

日高春睡足帖馬賞年華倒插銀魚袋行隨金犢車還
攜新市酒遠醉曲江花幾度歸侵黑金吾送到家

好飲耽長夜天明燭滿樓留人看獨脚賭馬換偏頭樂
奏曾無歇杯巡不暫休時時遙冷笑怪客有春愁

遨遊攜艷妓裝束是男兒杯酒逢花住笙歌簇馬吹
聲催曲急春色送歸遲不以聞街鼓華筵待月移

賞春唯逐勝大宅可曾歸不樂還逃席多狂慣扞衣歌
人踏日起語燕捲簾飛好婦唯相妬倡樓不醉稀

戟門連日閉苦飲惜殘春開鎖通新客教姬屈醉人請
歌牽白馬自舞蹈紅茵時輩皆相許平生不負身

新年高殿上始見有光輝玉雁排方帶金鵝立仗衣酒
深和碗賜馬疾打珂飛朝下人爭看香街意氣歸

遊士慵騎馬隨姬入坐車樓邊聽歌吹簾外插釵花樂
眼從人鬧歸心畏日斜蒼頭來去報飲伴到倡家

小婦教鸚鵡頭邊喚醉醒犬嬌眠玉簟鷹掣撼金鈴碧
地攢花障紅泥待客亭雖然長按曲不飲不曾聽

落第

牘前潛制淚衆裏自嫌身氣味如中酒情懷似別人暖
風張樂席晴日看花塵盡是添愁處深居乞過春

夏日途中

樹夾炎風路行人正午稀初蟬數聲過戲蝶一團飛日
色欺青鏡槐膏點白衣無成歸故里自覺少光輝

上令狐舍人

名利生愁地貧居歲月移買書添架上斷酒過花時宿

客嫌吟苦乖童恨睡遲近來唯儉靜將此荅深知

送振武將軍

葉葉歸邊騎風頭萬里乾金裝腰帶重錦縫耳衣寒蘆
酒燒蓬煖霜鴻撚箭看黃河古城道秋雪白漫漫

贈商山東於嶺僧

商嶺東西路欲分兩間茅屋一溪雲師言耳重知師意
人是人非不欲聞

周賀

賀字南卿初從浮圖名清塞詩格清雅與賈島無
可齊名寶歷中姚合為杭守投謁合誦其哭僧詩

大愛之加以冠巾

按統籤內周賀詩尚有數首可
選因重見清塞集內故不錄

徐獻忠曰賀詩沉鬱有格力寫象痛切意旨融變
五言皆有深致警句為多

近體詩

旅情

黃葉下堦頻徐徐起病身殘秋螢出盡獨夜雁來新別

業去千里舊鄉空四鄰孤舟尋幾度又識岳陽人

冬日山居思鄉

大野始嚴凝雲天曉色澄樹寒稀宿鳥山迴少來僧背
日收窓雪開爐釋硯冰忽然歸故國孤想寓西陵

入靜隱寺途中作

亂雲迷遠寺入路認青松鳥道緣巢影僧鞋印雪蹤草
烟連夜燒溪霧隔霜鐘更遇樵人問猶言過幾峰

春喜友人至山舍

鳥鳴春日晚喜見竹門開路自高巘入人騎瘦馬來折
花林影動移石澗聲回更欲留深語重城暮色催

宿李樞書齋

書齋經暮雨四面絕纖埃眠客聞風覺飛蟲入燭來夜
涼書讀遍月正戶全開住遠稀相見留連宿始回

題何氏池亭

信是虛閒地亭高亦有苔繞池逢石坐穿竹到山回果
落纖萍散龜行細草開主人偏好事終不厭頻來

贈朱慶餘校書

風泉盡結冰寒夢徹西陵越信楚城得遠懷中夜興樹
停沙島鶴茶會石橋僧寺閣連官舍行吟過幾層

酬吳之問見贈

已當聽雁夜多事不同居故疾離城晚秋霖見月疎
赴鐘關靜戶帶葉卷殘書盪槩期南去荒園久廢鉏

出關後寄賈島

故國知何處西風已度關歸人值落葉遠路入寒山多

難喜相識久貧寧自悶
惟將來往信遙慰別離顏

春日寄友人

春居無俗喧時立澗前
村路遠少來客山深多過猿
帶巖松色老臨水杏花繁
除憶文流外何人更可言

早春越中留別盧元休

此行經歲久唯約半年回
野渡人初過前山雪未開
雁羣逢燒斷林色映川來
是夜蘆中宿嚴家有釣臺

留別南徐故人

三年蒙見待此夕是前程未斷却來約且伸臨去情潮
回灘鳥下月上客船明他日南徐道緣君又重行

送淮陰縣令

隋堤楊柳煙孤棹正悠然蕭寺通淮戍蕪城枕楚田魚
鹽橋上市燈火雨中船故老青葭岬先知宓子賢

送張諲之睦州

遙憶新安舊扁舟去復還淺深看水石來往逐雲山到
縣餘花在過門五柳聞東征逐子去俱隱薜蘿間

長安送人

京國多離別年年渭水濱
空將未歸意說向欲行人
雁度池塘月山連井邑春
臨分惜攜手日暮一沾巾

送僧歸江南

洗足北林去遠途今已分
麻衣行嶽色竹杖帶湘雲
饑鼠緣危壁寒狸出壞墳
前峰一聲磬此夕不同聞

同處士秋懷少室故居

曾居少室黃河畔秋夢長
懸未得回扶病半年離水石

思歸一夜隔風雷
荒齋幾遇僧眠後
野菊頻經鹿踏來
燈下此心誰共說
傍松幽徑幾多苔

韓評事別業

門枕平湖秋景好
水烟松色遠相依
罷官餘俸租田種
送客回舟載石歸
離岼游魚逢浪返
望巢寒鳥逆風飛
嵩陽舊隱多時別
閉目閒吟憶翠微

夏日寺居寄楊侍御

雨過北林空晚涼
院閒人少掩斜陽
十年多病度落葉

萬里亂愁生夜床終欲返耕甘性拙久慙他事與身忙
還知謝客名先重肯爲詩篇問楚狂

送石協律歸吳

僧窓夢後憶歸耕水涉應多半月程幕府罷來無藥價
紗巾戴去有山情夜隨靜渚離蛩語早過寒潮背井行
已讓辟書稱抱疾滄洲便許白髭生

送郭秀才歸金陵

夏後客堂黃葉多又懷家國起悲歌酒前欲別語難盡

雲際相思心若何
烏下獨山秋寺磬
人隨大舸晚江波
南徐舊業幾時到
門掩殘陽積翠蘿

送廬岳僧

浪匝湓城嶽壁青
白頭僧去掃禪局
龕燈度雪補殘衲
山日上軒看舊經
泉水帶冰寒溜溜
薜蘿逢雨曙烟腥
已知身事非吾道
甘卧荒齋竹滿庭

潯陽與孫郎中醺回

別酒已酣春漏前
他人扶上北歸船
潯陽渡口月未上

漁火照江仍獨眠

送僧

草履初登南客船
銅瓶猶貯北山泉
衡陽舊寺秋歸後
門鎖寒潭幾樹蟬



御定全唐詩錄卷七十一